

শিক্ষা প্রতিষ্ঠানে গোলযোগ চলতে থাকলে দেশ ধ্বংস হতে বাধ্য : রাষ্ট্রপতি

জয়পুরহাট, ২৯শে আগষ্ট (বাসস)।— রাষ্ট্রপতি বর্তমানে দেশের কয়েকটি শিক্ষা প্রতিষ্ঠানে গোলযোগ ও বিশৃঙ্খলা প্রসঙ্গে বলেন, শিক্ষা জাতির মেরুদণ্ড। রাষ্ট্রপতি বলেন, এই প্রবণতা অব্যাহত থাকলে দেশ ধ্বংস হতে বাধ্য।

তিনি শিক্ষার ন্যায় এই গুরুত্বপূর্ণ দিকটি বিবেচনা করার আহ্বান জানান। ছাত্রদের রাজনীতিতে অংশগ্রহণে নিরুৎসাহিত করার উদ্দেশ্যে জাতীয় পার্টির ছাত্র সংগঠন নিষিদ্ধ করা হয়েছে বলে রাষ্ট্রপতি উল্লেখ করেন।

রাষ্ট্রপতি বিরোধী দলগুলোর প্রতি জাতীয় পার্টির দৃষ্টান্ত অনুসরণের জন্য তার আহ্বানের কথা পুনর্বক্ত করেন এবং শিক্ষা প্রতিষ্ঠানগুলোতে শিক্ষার পরিবেশ রক্ষার ব্যাপারে সহায়তার আহ্বান জানান।

রাষ্ট্রপতি আজ এখানে আয়োজিত এক জনসভায় ভাষণ দিচ্ছিলেন। তিনি বগুড়া থেকে জয়পুরহাট যাওয়ার পথে বেশ কয়েকটি ছোট ছোট সমাবেশে ভাষণ দেন।

রাষ্ট্রপতি বলেন, তার সরকার একটি সুখী ও সমৃদ্ধিশালী বাংলাদেশ গড়তে সংকল্পবদ্ধ। রাষ্ট্রপতি এইচ.এম.এরশাদ বলেন তার সরকারের উদ্যোগে নেয়া ব্যাপক উন্নয়ন তৎপরতার ফলে দেশের জনগণের মধ্যে এক অভাবনীয় নবজাগরণের জোয়ার (শেষ পৃ. ২-এর ক. দেখুন)

রাষ্ট্রপতি

(১ম পাতার পর)

লক্ষ্য করা যাচ্ছে। রাষ্ট্রপতি বলেন; এই জাগরণ আমাদের ধরে রাখা উচিত। বর্তমান উন্নয়ন প্রক্রিয়াকে অব্যাহত রাখার জন্য এই জোয়ারকে একটি চালিকাশক্তি হিসেবে কাজে লাগাতে হবে।

রাষ্ট্রপতি সারারাত বগুড়ায় অবস্থানের পর আজ সকালে জয়পুরহাট পৌঁছেন। জয়পুরহাট আসার পথে বিভিন্ন স্থানে গাড়ী ধামিয়ে তিনি সাধারণ মানুষের সাথে কথা বলেন এবং তাদের কুশল জিজ্ঞাসা করেন। এর আগে রাষ্ট্রপতি বগুড়ায় জেলা পরিষদ হলে জাতীয় পার্টির এক বৈঠকে ভাষণ দেন। তিনি সাক্ষিট হাউসে স্থানীয় রাজনৈতিক নেতৃবৃন্দ এবং বিশিষ্ট লোকজনের সঙ্গে জেলার বিভিন্ন সমস্যা সম্পর্কে আলোচনা করেন। রাষ্ট্রপতি সাক্ষিট হাউসে পথকলি ট্রাষ্টের জন্য বগুড়া শিল্প ও বণিক সমিতির দান গ্রহণ করেন।

এছাড়া জয়পুরহাটে অনুষ্ঠিত জনসভায় উপস্থিত বিভিন্ন লোকজনের কাছ থেকেও তিনি পথকলি ট্রাষ্টের জন্য দান গ্রহণ করেন। রাষ্ট্রপতি এরশাদ বলেন, দেশের রাজনীতিতে বর্তমানে দুটি পৃথক শ্রোতধারা লক্ষ্য করা যাচ্ছে। একটি ইতিবাচক এবং অপরটি নেতিবাচক। রাষ্ট্রপতি বলেন, শেষেরটি হলো বড় বড় কথার রাজনীতি।